

# DIOS Tu Bain, Selu Bain Dekemi

*Génesis 1:1-15, 18-21, 23-25*

Tiba ajke' depeepunu uwanu, **Diosren juuwaami**. Diosyaa palaachi ne patituren naa selu bain, naa tu bain dekemi. Tu naa ti muuteba jutyuwaami. Aa lamaaya entsa tunu kumuinchi debukaa tanamuwaami. Tsenmin nukaba aa dishkejtsa tene juuwaami. Tsenñu Dios' Espírituya tsanandala ne neintsumuwaami.

Tsenñu Dios tsandimi: Danguisa, timi. Tsenmalan danguikemi. Tsenñu Dios dannamunuya dishkejtsa jumuba tsaa velekemi. Tsejtu Dios dandamunuya *mandala* mumu pumi, tsenmin dishkejtsanuya *kepe* mumu pumi. Juntsanguiña **ajke' malu** tiya' kepemi.

Dios pinu devela' eekemi. Tsenñu manbaateya selusha kai'sha shuwanmala, kamanbaateya pelesha shuwami. Juntsanguiña **pai malu** tiya' kepemi.

Tsenmin Dios pelesha shuwamu pinuya tuba devela' eekemi. Tsanguiña lamaa jumula bain, naa tu bain, tsenmin pijula jumula bain devela' tiyala. Tsejtu Dios juntsanguitu tiba ura deefñu katami. Tsenmin Dios ya' palaachiren tiba deke' faawaami, naa awaimu juulanu bain, naa chi juulanu bain, naa puka juulanu bain, tsenmin kumuinchi chi jumulanu bain deke' faawaami. Tsejtu tiba Dios' deke' faawaañu jumula deechu' jundene juula. Juntsanguiña **pen malu** tiya' kepemi.

Tsenmala umaa entsaba **taapai malu** jumunuya, Dios pajtaa kemi entsa tunu mandala danbunutsu, tsenmin naa kepe pajta bain, naa makarala bain dekemi. Tsejtu tiba dekeñu jumula yuj ura deefñu katami.

Tsenmala umaa entsaba **man malu** jumunuya, Dios ti animaa jumulanuba dekemi, tsenmin naa pijulatala bain, naa lamaasha bain pumu alla jumula bain dekemi.

Tsenmin naa lamaasha jelekenuu aa animaa pumulanu bain dekemi, tsenmin naa ti animaa jumula bain dekemi. Tsenmin naa pishkulanu bain, naa tiba jekachi neimulanu bain dekemi. Tsenmin tiba entsa tusha chumulanuya yaichi fikenuu tiremiya, entsa tusha tiba awamulanaa yaichi fikenuu tiremi. Tsejtu Dios tiba yachi dekeñu jumulanu keetu, yuj ura deefñu katami.

*Génesis 1:26, 31; 2:2, 7, 18, 21-23*

Tsejtu Dios tsandimi: Umaa cha' rukunaa kidaa. Cha' rukunu lala kerake kidaa. Tsenmala juntsa cha' rukaa naa kumuinchi animaalanu bain, allalanu bain, naa pishkulanu bain uudenguen chunu tsuve, timi. Apa Dios, Espiritu Santoba bain, naa ya' Naba bain kuindakindaa tsandintsumi. Tsejtu naa pema juuñundi pa' bain, yaa ma Dios juuren tsandimi.

Tsejtu Dios cha' rukunu ketu, tuchiren muute dekemi. Tsanguetu kijkapanu juipu' ishmu tire' chujtimi. Tsenmin juntsa' cha' rukunu aseetanguiikenu pensa bain kumi. Naa Diosnu keemija' naa uwanuba chunuu tirenu jumu aama bain kumi. Tsaaren Dios animaalannya juntsangue aseetanguikenuu pensa pungue kendyumi. Tsejtu Dios juntsa rukunu Adán mumu pumi.

Tsejtu bene Bale Ruku Dios entsandimi: Unbeeruku maali juu chunañu urajtuve. Main yanu tyeeba ura' kivetenuu jumu kenu tsuyu, timi. Tsejtu Bale Ruku Dios juntsa cha' rukunu tangan jutyungue kaskaatu, juntsanaren ma vi'chi kalare', junu ya' allachiren demandu'kaami. Tsejtu Bale Ruku Dios juntsa vi'chichiren ma supu shinbu ke' kujtemi. Tsejtu Adánnu taji' keewaajimi. Juntsa shinbuchi ya' mumu Eva juwaami.

Tsejtu Dios yachi tiba dekeñu jumula yuj ura deeñu katami. Juntsanguiñaas entsaba **mandishmain malu** tiya' kepemi.

Dios kumuinchi entsaa jumula deketu mandishmain malunuren tsangue dekemi. Tsejtu Dios tiba deke' faaware' mitya **mandishpai malunuya** lekami.